

摘藻堂四庫全書薈要

集部

欽定四庫全書蒼會要

集部

漢魏六朝百三家集卷九十六

八



詳校官候選知縣臣吳甸華

欽定四庫全書薈要卷一萬九千六百八十八

集部

漢魏六朝百三家集卷九十六

明 張溥 輯

劉孝綽集

表

爲鄱陽嗣王初讓雍州表

臣聞大邦維屏既慙宗子之詩思樂泮宮有缺僖公之
頌特以周興九伯錫壤參虛漢啟二河分珪舊楚身私

家慶總集微躬雍部襟帶跨制數州西拒峽關北跨鄧
塞雖復呼韓來朝橐街納質二虜尋戈四郊無警猶當
王戎雅識羊祜尚義臣退求諸已無或宴安進思盡忠
幾乎私竭

啟

謝高祖啟

臣不能銜珠避顛傾柯衛足以茲踈悖與物多忤兼逢
匿怨之友遂居司隸之官交構是非用成萋斐日月昭

回俯明枉直獄書每御輒鑒蔣濟之寃灸髮見明非關
陳正之辯遂漏斯密網免彼嚴棘得使還同士伍比屋
唐民生死肉骨豈侔其施臣誠無識孰不戴天踈遠敵
隴絕望高闕而降其接引優以旨喻於臣微物足爲榮
隕況剛條落葉忽沾雲露周行所寘復齒盛流但雕朽
污糞徒成延獎捕影繫風終無効答

與東宮啟

臣聞之先聖以衆惡之必監焉衆好之必監焉豈非孤

特則積毀所歸比周則積譽斯信知好惡之間必待明
鑒故晏嬰再爲阿宰而前毀後譽後譽出於阿意前毀
由於直道是以一犬所噬旨酒質其甘酸一手所搖嘉
樹變其生死又鄒陽有言士無賢愚入朝見嫉至若臧
文之下展季靳尚之放靈均絳侯之排賈生平津之陷
主父自茲厥後其徒寔繁曲筆短辭不暇殫述寸管所
窺常由切齒殿下誨道觀書俯同好學前載枉直備該
神覽臣昔因立侍親承緒言飄風貝錦譬彼讒慝聖旨

殷勤深以爲歎臣資愚履直不能杜漸防微曾未幾何
逢訛罹難雖吹毛洗垢在朝而同嗟而嚴文峻法肆姦
其必奏不顧賣友志欲要君自非上帝運超己之光昭
陵陽之虐舞文虛謗不取信於宸明在縲嬰纆幸得蠲
於庸闇裁下免黜之書仍頒朝會之旨小人未識通方
繫馬縣車息絕朝覲方願滅影銷聲遂移林谷不悟天
聽罔已造次必彰不以距違見疵復使引籍雲陛降寬
和之色垂布帛之言形之千載所蒙已厚況乃恩等特

召榮同起家望古自惟彌覺多忝但未渝丹石永藏輪
軌相彼工言構茲媒譏且款冬而生已凋柯葉空延德
澤無謝陽春

謝爲東宮奉經啟

皇太子四術夙知三善非學猶復旁求儒雅應物稽疑
業光夏校德茂周庠諸侯宋魯於焉觀則參陪盛禮莫
匪國華臣雖職典經圖而同官不一推擇而舉尚多髦
俊寵光曲被獨在選中他日朝聞猶甘夕死況茲恩重

彌見生輕

謝給藥啟

一物之微遂留傳育名醫上藥爰自城府雖巫咸視診
岐伯下鍼松子玉漿衛卿雲液比妙衆珍實云多愧

謝越布啟

比納方綃既輕且麗珍邁龍水妙越鳥夷

送瑞鼎詣相國梁公啟

生木游火之禽夾階紀朔之華白環銀笄之迹素雉金

船之瑞自天有祚不爲定於郊廓虛其所止非獨在於汾陰

求豫北伐啟

或以臣素無飛將之目未從嫖姚之伍言易行難收功
理絕然桓冲稱謝安無將略文靖公遂破苻堅山濤諳
羊祐不强建成侯卒平孫皓微臣之譬兩賢誠無等級
小虜之方二寇勢踰枯朽

謝晉安餉米等啟

傳詔李孟孫宣教旨垂賜米酒瓜筍菹脯鮓茗八種氣
苾新城味芳雲杜江潭抽節邁昌荇之珍壇場擢翹越
葺精之美羞非純束楚磨衰似雪之驢鮓異陶瓶河鯉
操如瓊之祭茗同食缺酢類望甘免千里宿春省三月
種聚小人懷惠大懿難忘

謝安成王賚祭孤石廟胙肉啟

味過淪鳳珍越屠龍故使屏翳收風馮夷淨浪神居鷁
首獨汎安流民幸同附得徵邁迂復等受釐預頌純嘏

恩靈所降信次委積報生以死竊聞斯義

書

答湘東王書

伏承自辭皇邑爰至荆臺未勞刺舉且擣高麗近雖預
觀尺錦而不睹全玉昔臨淄詞賦悉與楊修未殫寶笥
顧慙先哲渚宮舊俗朝衣多故李固之薦二邦徐珍之
奏七邑威懷之道兼而有之當欲使金石流功恥用翰
墨垂迹雖乖知二偶達聖心爰自退居素里却掃窮閑

比楊倫之不出譬張摯之杜門昔趙卿窮愁肆言得失
漢臣鬱志廣敘盛衰彼此一時擬非其匹竊以文豹何
辜以文爲臯繇此而談又何容易故韜翰吮墨多歷寒
暑既闕子幼南山之歌又微敬通渭水之賦無以自同
獻笑少酬褒誘且才乖體物不擬作於玄根事殊宿諾
寧貽愆於朱亥顧已反躬載懷累息但瞻言漢廣邀若
天涯區區一念分宵九逝殿下降情白屋存問相尋食
椹懷音矧伊人矣

答雲法師書

孝綽和南辱誨垂示勅旨所答劉太僕思効啟義窮深
遠語兼巧便伏聞希有身心踴躍昔戈盾夾車備不虞
於周后兵旗引駕防未然於漢君斯皆執心黃屋瑞無
紺馬事極寰寓之中理隔天人之外皇上自茲善覺降
迹閭浮以住地之心行則天之化故能慈導三有仁濟
萬物猶以法藥未周寶船不倦解劔却蓋躬詣道場瑞
花承足人觀雕輦之盛金輪啟路物覩重英之飾顯實

開權事均祇鷲本無四畏寧慮五怨思効遂虜引梁丘
隨劔之說日殫觸瑟之辭何異迴龍象於兔徑注江海
於牛迹聖旨慙懃曲根誘喻豈直淨一人之垢衣將以
破羣生之暗室弟子世傳正見幼覩真言但惑網所縈
塵勞自結微因宿植仰逢法教親陪寶座預餐香鉢復
得俱聽一音共聞八解庶因小葉受潤大雲猥蒙開示
深自慶幸不勝歡喜略附陳誠劉孝綽和南

與弟書

方弘游典墳寤歌林澗覽興衰於千載觀榮落於四時
序

昭明太子集序

臣竊觀大易重明之象著焉抑又聞之七鬯之義存焉
故書有孟侯之名記表元良之德歷選前古以洎夏周
可得而稱啟誦而已雖徹聖挺賢光乎二代高文精義
闋爾無聞漢之顯宗晉之肅祖昔自春宮益好儒術或
專經止於區易或持論窮於貞假子桓雖摘藻銅省集

講肅成事在藩儲理非皇貳未有正位少陽多才多藝
者也粵我大梁之二十一載盛德備乎東朝若乃有縱
自天惟睿作聖顯仁立孝行於四海如珪如璋不因琢
磨之義爲臣爲子寧待觀喻之言惟性道難聞而文章
可見故俯同志學用晦生知以弦誦之餘辰總鄒魯之
儒墨徧緜緜於七閣彈竹素於九流地居上嗣實副元
首皇帝垂拱巖廊委成庶績時非從守事或監撫雖一
日二日攝覽萬幾猶臨書幌而不休對欹案而忘怠況

復延納侍講討論經紀去聖滋遠愈生穿鑿枝分葉散
殊路倦馳靈臺辟雍之疑禋宗祭社之繆明章申老之
議通顏理王之說量覈然否剖析同異察言抗論窮理
盡微於時淹中稷下之生金華石渠之士莫不過衢樽
而挹多少見斗極而曉西東與夫盡春卿之道贊仲尼
之宅非賈誼於蘇林問蕭侍於棗據區區前史不亦慙
歟加以學貫總持辨同無礙五時密教見猶鏡象一乘
妙旨觀若掌珠及在布金之園處如龍之衆開示有空

顯揚權實是以徧動六地普雨四花豈直得解櫻須提
舍鉢瓶沙騰曇言德梵志依風而已哉若夫天文以爛
然爲美人文以煥乎爲貴是以隆儒雅之大成遊雕蟲
之小道握牘持筆思若有神曾不斯須風飛雷起至於
宴遊西園祖道清洛三百載賦該極連篇七言致擬見
諸文學博逸興詠並命從遊書令視草銘非潤色七窮
煒燧之說表極遠大之才皆喻不備體詞不掩義因宜
適變曲盡文情竊以屬文之體鮮能周備長卿徒善既

累爲遲少孺雖疾俳優而已子淵淫靡若女工之蠹子
雲侈靡異詩人之則孔璋詞賦曹祖勸其修今伯喈笑
贈摯虞知其頗古孟堅之頌尚有似贊之譏士衡之碑
猶聞類賦之貶深乎文者兼而善之能使典而不桀遠
而不放麗而不淫約而不儉獨擅衆美斯文在斯假使
王朗報箋卞蘭獻頌猶不足以揄揚著述稱贊才章況
在庸才曾何彷彿然承華肇建濫齒時髦居陪出從逝
將二紀譬彼登山徒仰峻極同夫觀海莫澄波瀾但職

官書記預聞盛藻歌詠不足敢忘編次謹爲一帙十卷
第目如左日升松茂與天地而偕長壯思英詞隨歲月
而增廣如其後錄以俟賢臣

碑

司空安成王碑

昔者重華文命並胄高陽之苗豐邑春陵俱纂帝堯之
緒而虞夏革運姚姒之姓已分高光再興大漢之名無
改如我皇家梁齊代建異文叔之紹開起自王族非伯

禹之更姓公則本枝別幹誕自河嶽五百之期實膺命
世卜商有問是謂色難承志望顏在公斯易至如文琰
之對食餘幼權之言爵里衛子之朗月映山杜生之凝
脂點漆惟公具美歷駕前修峨峨焉非嶽陵之所至浩
浩焉總江漢而爲長故能擊水三千搏風九萬排天闕
而俯眦掩浮雲而上征皇帝甄名挺聖河洛有徵握衡
含樞奄一時夏利建藩屏固葉深根邨霍艷郇方周啟
祚封公爲安成王食邑二千戶允同衛叔賜寶器於商

郊殊異唐侯戲桐珪於汾水乃拜公爲平西將軍荊州
刺史楚之對齊屈完引城池之固荆之比宋墨翟陳轅
路之殊品金作貢不異淮海珠璣犀象又無求于晉國
況以雲夢九百之宏侈章華三休之巨麗公禦煩以寡
居高而降執冲虛之道無矜滿之情其爲政也莊敬足
以範物慈惠足以庇民剛毅足以威暴清貞足以勵俗
天監十七年薨春秋四十有五凡我庶民竊親高義況
復祇承帝命來仕王家免園晚春叨從者之賜高唐暮

天奉作賦之私常愍慶雲之惠不酬而搖落奄至豈謂
輕塵之効莫展而峻極先頽思所以立言貞石貽厥長
世銘曰

昔在文韶五賢二聖漢藩魏屏微風不競於赫我梁德
符姬姓康王康叔異時同盛爰自妙年令問不已一孝
一悌寔光行始義府文場詞人髦士波瀾莫際牆仞難
窺用茲先覺導此後知德大心小居高志卑再握不倦
三吐忘疲飛龍在天肇基宛瀆地猶小肺民同世復皇

情睽正屬難推轂允矣宗英移藩改牧誰謂路永江漢
已浮彼蒼不惠遽反成周川迴沂舳塗引歸旒

栖隱寺碑

開方便門示真實相置甘露室遵甘露津苦語輒言隨
方弘訓俯心降迹逐物重輕中枝小葉各隨業根慙其
四流五結有來而不散八慢九邪一淪而莫曉如彼醫
王等之藥樹去聖茲遠思聖茲深誠敬所先是歸龕廟
自妙法東注寶化西漸公卿貴仕賢哲偉人莫不嚴事

招提師仰慧覺欲使法燈永傳勝因長久銘曰

給孤焚蕩善勝崩淪堂堂宗匠克紹慧因地雖舊域其
宇維新召崇且思羊碑猶泣況我仁祠義踰生立遺愛
伊何形于南邑亦有庶民經始攸急珠殿連雲金層輝
景衢交達巷門臨樹屏五居推妙三空愧靜銘施柱側
記法窟前孰云千載餘迹方傳敢宣重說敬勒雕鐫芬
域未滅斯文在旃

樂府

釣竿篇

釣舟畫彩鷁漁子服冰紈金轄茱萸網銀鉤翡翠竿斂
橈隨水脈急漿渡江湍湍長自不辭前浦有佳期船交
橈影合浦深魚出遲荷根時觸餌菱芒乍罾絲蓮度江
南手衣渝京兆眉垂竿自有樂誰能爲太師

夜聽妓賦得烏夜啼

鷓絃且輟弄鶴操暫停徽別有啼烏曲東西相背飛倡
人怨獨守蕩子殊未歸忽聞生離唱長夜泣羅衣

銅雀妓

雀臺三五日絃吹似佳期
況復西陵晚松風吹總帷危
絃斷復續妾心傷此時誰言留客袂
遂一作掩望陵悲

班婕妤怨

應門寂已閉非復後庭時
況在青春日萋萋綠草滋
妾身似秋扇君恩絕履綦
詎憶遊輕輦從今賤妾辭

三婦豔

大婦縫羅裙中婦料繡文
唯餘最小婦窈窕舞昭君
丈

人慎勿去聽我駐浮雲

櫂歌行

日暮楚江上江深風復生
所思竟何在相望徒盈盈
舟子行催棹無所喝流聲

詩

詠風

四言

嫋嫋秋聲習習春吹鳴
茲玉樹渙此銅池羅幃自舉襟
袖乃披慙非楚侍濫賦雄雌

侍宴

外編作任昉者
非以下五言

清宴延多士鴻漸濫微薄臨炎出蕙樓望辰躋茵閣上
征切雲漢俛眺周京洛城寺鬱參差街衢紛漠漠禁林
寒氣晚方秋未搖落皇心重發志賦詩追並作自昔承
天寵於茲被人爵選言非綺綃可以儷金腹

又

茲堂乃峭嶠伏檻臨曲池樹中望流水竹裏見攢枝欄
高景難蔽岫隱雲易垂邂逅逢休幸朱躡曳青規丘山

不可答葵藿空自知

三日侍華光殿曲水宴

薰被三陽暮濯禊元巳初
皇心曠樂飲帳殿臨春渠
豫遊高夏諺凱樂盛周居
復以焚林日丰茸花樹舒
羽觴環堦轉清瀾傍席
䟽妍歌已嘹亮妙舞復
紆餘九成變絲竹百戲
起龍魚

三日侍安成王曲水宴

匯澤良孔殷分區屏中
縣躡跨兼流采襟喉
邇封甸吾

王奄艷畢析珪承羽傳不資魯俗移何待齊風變東山
富遊士北土無遺彥一言白璧輕片善黃金賤餘辰屬
上一作元已清祓追前諺持此陽瀨遊復展城隅宴芳洲
亘千里遠近風光扇方歡厚德重誰言薄遊倦

春日從駕新亭應制

旭日輿輪動言追河曲遊紆餘出紫陌迤邐度青樓前
驅掩蘭徑後乘歷芳洲春色江中滿日華巖上留江風
傳葆吹巖華映采旂臨渦起睿作駟馬暫停輶侍從榮

前阮雍容慙昔劉空然等彈翰非徒嗟未遒

侍宴集賢堂應令

北閣時既啟西園又已闢宮屬引鴻鷺朝行命金碧伊
臣獨何取隆恩徒自昔布武登玉墀委坐陪瑤席綢繆
參宴笑淹留奉觴醪壺人告漏晚烟霞起將夕反景入
池林餘光映泉石

侍宴餞庾於陵應詔

皇心眷將遠帳餞靈芝側是日青春獻林塘多秀色芳

卉疑綸組嘉樹似雕飾遊絲綴鶯領光風送綺翼下輦
朝既盈留宴景將昃高辨競談端竒文爭筆力伊臣獨
無伎何用奉吹息

侍宴餞張惠紹應詔

滄池誠自廣蓬山一何峻麗景花上鮮油雲葉裏潤風
度餘芳滿鳥集新條振餞言班俊造光私獎輜去徒然
謬反隅何以窺重仞

餞張惠紹應令

鮮雲積上月凍雨晦初陽迴風飄淑氣落景煥新光竹
萌始防露桂挺已含芳瑤階變杜若玉沼發攢蔣聖襟
惜岐路曲宴闢蘭堂

侍宴離亭應令

輶轅東北望江漢西南永羽旗映日移鏡吹臨風警令
王愍追送纚舟宴俄頃掩袂眺征雲銜杯惜餘景首燕
徒有心局步何由騁

奉和昭明太子鍾山解講

御鶴翔伊水策馬出王田我后遊祇鷺比事實光前翠
蓋承朝景朱旗曳曉烟樓帳縈巖谷緹組曜林阡況在
登臨地復及秋風年喬柯變夏葉幽澗潔涼泉停鑿對
寶座辯論悅人天淹塵資海滴昭暗仰燈然法朋一已
散笳劍儼將旋邂逅逢優渥託乘侶才賢擣辭雖並命
遺恨獨終篇

和湘東王理訟

馮翊亂京兆廣漢欲兼治豈若兼邦牧朱輪褰素帷淮

海封畿地雜俗良在茲禁姦摘銖兩馭黠震豺狸

陪徐僕射晚宴

夫君追宴喜十日遞來過築室華池上開軒臨芰荷方
塘交密篠對雷接繁柯景移林改色風去水餘波洛城
雖半掩愛客待驪歌

上虞鄉亭觀濤津渚學潘安仁河陽縣詩

昔余筮賓始衣冠仕洛陽無貲徒有任一命忝爲郎再
踐神仙側三入宗賢旁東朝禮髦俊虛薄廁才良遊談

侍名理擢管創文章引籍陪下膳橫經參上庠誰謂服
事淺契闊變炎涼一朝謬爲吏結綬去承光烹鮮徒可
習治民終未長化雞仰季智馴雉推仲康此城鄰夏穴
楠蠹茂筠篁孝碑黃絹語神濤白鷺翔遨遊佳可望釋
事上川梁秋江凍雨絕反景照移塘織羅殊未動駭水
忽如湯乍出連山合時如高蓋張漂沙黃沫聚礫石素
波揚榜人不敢唱舟子豈能航離家復臨水眷然思故
鄉中來不可絕奕奕苦人腸沂洄若無阻謝病返清漳

太子狀落日望水

川平落日迴落照滿川漲復此

一作在

淪波地派別引沮

漳耿耿流長脉熠熠動微光寒鳥逐查漾饑鷓拂浪翔

臨泛

一作流

自多美況乃

一作此

還故鄉榜人夜理檝權女

閭成粧欲待春江曙爭塗向洛陽

登陽雲樓

吾登陽臺上非夢高唐客回首望長安千里懷三益顧

帷慙入楚降私等申白西沮水潦收昭

一作瑕

丘霜露積

龍門不可見空慕凌寒栢

夕逗繁昌浦

日入江風靜安波似未流岸迴知舳轉解纜覺船浮暮
烟生遠渚夕鳥赴前洲隔山聞戍鼓傍浦喧棹謳疑是
辰陽宿於此逗孤舟

櫟口守風

春心已應豫歸路復當歡如何此日風霾曠駭波瀾倏
見搖心慘俄瞻鄉路難賴有同舟客移宴息層巒華茵

藉初卉芳樽散緒寒
謔浪雖云善江流苦未安
何由入故園詎即紉新蘭
寄謝浮丘子暫欲假飛鸞

還渡浙江

季秋弦望後輕塞朝夕殊
商人泣紈扇客子夢羅襦
憂來自難遣况復阻川隅
日暮愁陰合繞樹噪寒烏
濛漠江烟上蒼茫沙嶼蕪
解纜辭東越接軸驚西徂
懸帆似馳驥飛棹若驚鳧
言歸遊俠窟方從冠蓋衢

江津寄劉之遴

與子如黃鵠將別復徘徊經過一柱觀出入三休臺共
摘雲氣藻同舉霞紋杯佳人每曉遊禁門恒晚開欲寄
一言別高駕何由來

發建興渚示到陸二黃門

外編作吳均
題云酬別非

扁舟去平樂還顧極川梁猶聞棗下吹尚識杏間堂洛
橋分曲渚官寺隱回塘客行裁跬步即事已多傷況復
千餘里悲心未遽央

酬陸長史倓

王祭始一別猶且歎風雲況余屢之遠與子亟離羣如

何持此念復爲今日分分悲宛

一作
悵

如昨弦望殊揮霍

行舟雖不見行程猶可度度君路應遠期寄新詩返相
望且相思勞朝復勞晚薄暮閣人進果得承芳信殷勤

覽妙書留連披雅韻洌洲

一作
州

財賦總慈山行旅鎮已

切臨睨情遽動思歸引歸歟不可即前途方未極覽諷
欲諼誚研尋還慨息來喻勗雕金比質非所任虛薄無
時用徘徊守故林屏居青門外結宇灞城陰竹庭已南

映池牖復東臨喬柯貫簷上垂條拂戶陰條開風暫入

葉合影還沈帷屏溽早露階雷擾昏禽衡門謝車馬賓

席簡衣簪雖愧陽陵

一作春

曲寧無流水琴蕭條聊屬和

寂寞少知音平生竟何託懷抱共君深一朝四美廢方

見百憂侵曰余濫官守因之泝廬久

一作九

水接淺原陰

山帶荆門右從容少職事疲病踈僚友命駕獨尋幽淹

留宿廬阜廬阜擅高名峒峒凌太清舒雲類紫府標霞

同赤城北上輪難進東封馬易驚未若茲山險車騎息

逢迎山橫路似絕徑側樹如傾蒙籠乍一啟磔碗無暫
平倚巖忽迴望援蘿遂上征乍觀秦帝石復憩周王城

交峯隱玉雷對澗距金楹風傳鳳臺瑄雲渡洛賓笙紫
書時不至丹爐且未成無因追羽翮及爾宴蓬瀛蓬瀛
不可託悵然反城郭時過馬鳴院偶憩鹿園閣既異人
世勞聊比化城樂影塔圖花樹經臺總香藥月殿曜朱

旛風輪和寶鐸園榭

一作垣

即重嶺階基仍巨壑朝猿

一作

溪響薨棟夜水聲帷薄餘景鶩登臨方宵盡談詭談詭

有名僧慧義似傳燈遠師教逾闡生公道復弘小乘非
汲引法善招報能積迷頓已悟爲懽得未曾爲懽誠已
往坐卧猶懷想況復心所積一作親茲地多諧賞惜哉無
輕軸更泛輪湖上可思不可見離念空盈蕩賈生傳南
國平子相東阿優游匡贊罷縱橫辭賦多方才幸同貫
無令絕詠歌幽谷雖云阻煩君計吏過

答何記室

游子倦飄蓬瞻途杳未窮晨征凌迸水暮宿犯頽風出

洲分去燕向浦逐歸鴻
蘭芽隱陳葉荻苗抽
故叢忽憶園間柳
猶傷江際楓
吾生棄武騎
高視獨辭一作餘
雄既殫孝王產兼傾
卓氏僮罷籍
睢陽困陪謁
建章宮紛余似鑿枘
方圓殊未工
黑貂久自弊
黃金屨已空
去辭追楚穆還耕耦
漢馮巧拙良爲異
出處嗟莫同
若厭蘭臺右見訪
灞陵東

答張左西

相思如三月相望非
兩宮持此連枝樹
暫作背飛鴻
若

人惠思我摘藻蔚雕蟲
仙掌方晞露靈鳥正轉風
方假排虛翮相與北山叢

歸沐呈任中丞昉

南史云孝綽天監初爲著作
郎爲歸沐詩以贈任昉即此

步出金華省還望承明廬
壯哉宛洛地佳麗實皇居
虹蜺拖飛閣蘭芷覆清渠
圓淵倒荷芰方鏡寫簪裾
白雲夏峯盡青槐秋葉踈
自我從人爵蟾兔屢盈虛
殺青徒已汗司舉未云書
文昌愧通籍臨卽幸第如
夫君多敬

愛蟠木濫吹噓時時釋簿領駟駕入吾廬自唾誠礪硤
無以儷璠璵但願長閒暇酌醴薦焚魚

憶虞弟

下邑非上郡徒然想二馮余慙野王德爾助聖鄉風望
望餘塗盡悽悽良宴終朝蔬一不共夜被何由同

淇上戲蕩子婦

桑中始奕奕淇上未湯湯美人要雜佩上客誘明璫日
暗人聲靜微步出蘭房露葵不待勸鳴琴無暇張翠釵

挂已落羅衣拂更香如何嫁蕩子春夜守空牀不見青
絲騎徒勞紅粉粧

愛姬贈主人

卧久疑粧脫鏡中私自看薄黛銷將盡凝朱半有殘垂
釵繞落鬢微汗染輕紈同羞不相難對笑更成歡妾心
君自解挂玉且留冠

爲人贈美人

巫山薦枕日洛浦獻珠時一遇便如此寧關先有期幸

非使君問莫作羅敷辭
夜長眠復坐誰知
閨斂眉欲寄
同花燭爲照遙相思

遙見鄰舟主人投一物
衆姬爭之有客請余爲

詠

河流既浼浼
河鳥復關關
落花浮浦出
飛雉度洲還
此日倡家女
競嬌桃李顏
良人惜美珥
欲以代芳管
新縑疑故素
盛趙茂衰班
曳綃爭掩縠
搖佩奮一作奪鳴環
客心空振蕩
喬枝不可攀

古意

燕趙多佳麗，白日照紅粧。蕩子十年別，羅衣雙帶長。春

樓怨難守，玉階空自傷。復一作對此歸飛燕，銜泥繞曲房。

差池入綺幕，上下傍雕梁。故居猶可念，故人安可忘。相

思昏望絕，宿昔夢容光。魂交忽在御，轉側定他鄉。徒然

顧枕席，誰與同衣裳。空使蘭膏夜，炯炯對繁霜。

報王永興觀田

重門寂已暮，案牘罷囂塵。輕涼生筍席，微風起扇輪。浮

瓜聊可貴溢酒亦成珍復有寒泉井兼以瑩心神睽彼
忘言客閒居伊洛濱顧已慙困地徒知薑桂辛但願崇
明德無謂德無鄰

詠有人乞牛舌乳不付因餉檳榔詩

陳乳何能貴爛舌不成珍空持渝皓齒非但汙丹唇別
有無枝實曾要湛上人羞比朱櫻熟詎易紫梨津莫言
蒂中久當看心裏新微芳雖不足含咀願相親

夜不得眠

夜長愁反覆懷抱不能裁披衣坐惆悵當戶立徘徊風
音觸樹起月色度雲來夏葉衣窓落秋花當戶開光陰
已如此復持憂自催

望月有所思

秋月始纖纖微光垂步簷腫朧入牀簟髮髻鑿窓簾簾
螢隱光息簾蟲映光纖玉羊東北上金虎西南昃長門
隔清夜高堂夢容色如何當此時懷情滿胸臆

校書秘書省對雪詠懷

桂華殊皎皎柳絮亦霏霏詎比咸池曲飄颻千里飛
均班女扇羞儷曹人衣浮光亂粉壁積照朗彤闈鵲
搖羽至鴨鷓拂翅歸相彼猶自得嗟余獨有違終朝
守玉署方夜勞石扉未能奏絃綺何由辨團圍坐銷
風露質遊聯珠璧暉偶懷笨車是良知高蓋非既言
謝端木無爲陳巧機

詠百舌

山人惜春暮旭旦坐花林復值懷春鳥枝間弄好音遷

卷九十一
喬聲迴出赴谷響幽深下聽長而短時聞絕復尋孤鳴
若無對百轉似羣吟昔聞屢歡昔今聽忽悲今聽聞非
殊異遲暮獨傷心

侍宴擬劉公幹應令

副君西園宴陳王謁帝歸列位華池側文雅縱橫飛小
臣輕蟬翼龜勉謬相追置酒陪朝日淹留望夕霏

賦詠百論捨罪福詩

尋因途乃異及捨趣猶并苦極降歸樂樂極苦還生豈

非輪轉愛皆緣封著情一知心相濁樂染法流清

賦得照基燭詩刻五分成

南皮絃吹罷終奕且留賓日下房櫳閣

玉臺作閉

華燭命佳

人側光全照局迴花半隱身不辭纖手倦羞今夜向晨

同武陵王看妓

燕姬奏妙舞鄭女發清歌迴羞出曼臉送態表頓蛾寧
殊遇行雨詎減見凌波想君愁日落應羨魯陽戈

賦得遺所思

遺簪雕玳瑁贈綺織鴛鴦未若華滋樹交枝蕩子房別
前秋已落別後春更芳所思不可寄唯憐盈袖香

林下映月

明明三五月垂影當高樹攢柯半玉蟾衰葉彰金兔茲
林有夜坐嘯歌無與晤側光聊可書含毫且成賦

詠素蝶

隨蜂遶綠蕙避雀隱青薇映日忽爭起因風乍共歸出
沒花中見參差葉際飛芳華幸勿謝嘉樹欲相依

於座應令詠梨花

玉壘稱津潤金谷詠芳菲詎匹龍樓下素蕊映華

一作朱

扉雜雨疑霰落因風似蝶飛豈不憐飄墜願入九重闈

秋雨卧疾

賈君徭役少潘生民務稀及此同多暇高卧掩重闈寂
寂桑榆晚滂沱暄不晞電隙時光帳風簾乍扣扉

奉和湘東王應令二首

春宵

春宵猶自長春心非一傷月帶圓樓影風飄花樹香誰
能對雙燕暝暝守空牀

冬曉

冬曉風正寒偏念客衣單臨粧罷鉛黛含淚剪綾紈寄
語龍城下詎知書信難

月半夜泊鵲尾

客行三五夜息棹隱中洲月光隨浪動山影逐波流

和詠歌人偏得日照詩

獨明花裏翠偏光
粉上津屢將歌罷扇
迴拂影中塵
詠姬人未肯出

帷開見釵影
簾動聞釧聲
徘徊定不出
常羞華燭明

遙見美人採荷

菱莖時繞釧
棹水或沾粧
不辭紅袖濕
唯憐綠葉香

詠小兒採菱

採菱非採菜
日暮且盈舫
踟躕未敢進
畏欲比殘桃

詠眼

含嬌慢已合離怨動方開欲知密中意浮光逐笑迴
詠日應令

弭節馳暘谷照檻出扶桑園葵亦可幸傾葉奉離光
望月

輪光缺不半扇影出將圓流光照漭漭波動映淪漣
秋夜詠琴

上宮秋露結上客夜琴鳴幽蘭暫罷曲積雪更傳聲
賦得始歸鴈

洞庭春水綠衡陽旅鴈歸
差池高復下欲向龍門飛

元廣州景仲座見故姬一首

雜言

留故夫不踟躕別待春山上
相看採靡蕪

擬古聯句

少知雅琴曲好聽雅琴聲
雅琴不可聽一聽一沾纓

漢魏六朝百三家集卷九十六

欽定四庫全書薈要卷一萬九千六百八十九

集部

漢魏六朝百三家集卷九十七

明 張溥 輯

劉潛集

賦

歎別賦

在羈旅兮爲思每居常而不樂意難偕於駘蕩情易邀
於隕穫愁非招而自來憂試排而不却退求已以自省

慨撫衿而太息位不俟於一進髮徒彰於二色名有似
於務耕學無均於譬織在初歸之爲慶庶因拙而自收
保私庭之宴喜共昆弟而嬉遊校小文於搢筆比楷式
於臨流止每歡於接膝行如喜於同輶忽一去而數千
遂離居而別域阻同被於當寐乖共餐於終食唯憑遠
望以代歸負相思其無力

表

爲江侍中薦士表

臣聞天道不言資寒暑而成歲宸居垂拱寄守宰以宣
風若夜魚不欺朝琴在奏則殘殺自去汾射可追伏見
鎮北府水曹參軍濟陽江興字休恭立身貞白操業清
廉頗涉書記彌閑刀筆前攝縣沮漳無傷錦製巡行淮
海不忝繡衣若處以百里之邑使導一鄉之賦必能治
文無害迄用有成臣舉不避族非欲異姓居後知人爲
難實緣所悉而薦

爲江僕射禮薦士表

陛下緝禮裁樂化俗移風當宸思治分宵夢相枯岸之
珠既掄潤山之玉已薦伏見兼太學博士會稽賀瑒字
德璉幼能斧藻長則琢磨結卷就賢擔簦來學鄉塾染
其丹采朋友扣其洪鐘聲無愧於東筠材有踰乎西杞
如使聯事宗伯握蘭建禮庶用得其才人知自勗臣鑒
非止水職豫搜揚前竭謏聞先自鄉曲

爲雍州柳津請留刺史晉安王表

楚備寶臣秦兵不入齊多君子魏珠恥照足使文公懼

而側席孟軻歎而廢寢敢言借寇之願切望申耿之恩
陛下昔在潛龍因茲或躍固以陋臚臚於周原包匆匆
之佳氣昔次君出撫近駕班輪喬卿在政遙授袞服焉
馮熊軾而督盜御龍章而行部無虧變理有光司牧

爲臨川王解司空表

臣以庸薄謬竊隆重職班三事任總六條衣袞坐槐既
闕論道馳傳憩棠尤慚爲政而俯司土地仰變陰陽棟
撓之譏已彰愆伏之咎爰著今水沴乃作旱魃爲災山

無蒼蔚雲成烟火陛下曲私未垂策免臣職是當逃責
乞降茲台步協此天人

爲晉安王讓丹陽尹表

臣聞盈尺徑寸易取琢磨南箕北斗難爲簸挹何則良
工質美在器成珍假名責實涉求必殆

爲安成王讓江州表

臣聞失晨之雞雖不忘於改旦敗駕之馬終取忸於銜
鑣臣昔牧淮岱皇風咫尺一變至道易以爲政而亂政

莫理美錦徒傷豈可復宣六條闡化千里

又

臣聞六轡沃若不策元黃之馬九成輪奐無求擁腫之材何則跳踔之路已窮梁棟之用斯闕

爲臨川王解揚州表

臣自馳傳斗牛作牧淮海政刑兩空璿璣六運既昧弛張之要猶慚大小之獄故以結泳濡翼取愧能官每一進思無忘退食誠復恩私可憑而彛倫難紊敢恃慈弘

冒披心款乞解州任少弭素餐

為南平王讓徐州表

竊以淮岱務殷事乖坐嘯粉榆望重非可卧治臣繇頓
枕席動移旬晦恒恐尺波易流寸陰難保寧可復冒此
寵膺茲恩榮

為臨川王奉詔班師表

臣自受服廟堂申威塞表既驅熊羆之眾兼稟帷幄之
謀登濟河山夷滅趙魏將繫軹道之頸且屈渭橋之膝

而玄陰屈節祁寒方始降此慈弘愍茲介冑使燕然之
石願勒而不刊函谷之土將封而莫遂雖荷杖杜之恩
終慙采薇之旨

爲始興王上毛龜表

臣聞嘉瑞五靈既著方策故名千載可得而傳是以元
蔡赤文來表軒黃之政神龜青純用顯姬公之德出自
江安實荷謙夷之慶甲生毳羽寧非銷鑄之徵實皇家
之巨瑞庶民之休幸

彈文

彈賈執傳湛文

長兼御史中丞劉孝儀稽首言南康嗣王府行參軍知
譜事賈執與前中書舍人傳湛在王座飲酒時上不安
人從臺還聖體已和湛乃揚眉瞑目謂執曰卿念天子
我不見闕出悖慢言語連及於上共執忿諍湛昔經殺
牛誤父自殺近效殘貪賄賂狼籍特逢解網宥其餘命
自被棄廢尤懷怨憤謗訕不遜謹按前兼通事舍人臣

傅湛才薄駑蹇特荷抽擢自預左右頻蹈極刑押對鞠
書累逢闕過未聞報効反懷恚憤聖體不安臣下憂懼
而湛敢生怨望輕肆慢辭醜爭及父心無愛敬戲語連
上罪同悖逆未央馬瘦不覩廐令之忠甘泉道蕪遽見
扶風之罪宜其狗乎東市尸彼轂門南康嗣王府參軍
臣賈執始聞湛語初無逐雀之心末因私忿遂顯懷鴆
之逆雖迹似折奸意由肆憾惡慢於人自彰穢醜見辱
父子已會季倫之辭爭及其父復入梁蚡之歎是使王

媿悲於連累黑要喜於得用太子舍人始興蕃王臣蕭
毅幸因社祚爵預藩屏而散金失所設醴乖人雍容之
賓未遊於雕苑號怒之客日醉於雷池致使博徒跣弛
慢醉盈路醜顏受辱曾無發糾並恕伯厚之心俱鳴路
粹之責臣等參議請以見事依法免毅所居官解執知
譜事請議貶黜付之卿論不得廝預官流刺尚施行輒
不禁止

啓

謝女出門官賜紋絹燭等啟

臣孝儀啟左右表文成奉宣旨宜知臣私營發遣垂賜
紋絹二十疋燭二十挺臣家本貧敝事多蹇闕櫃室金
縷本非所宜孟姬作具猶苦未周殊澤未臨珍華兼重
制爲美服雙綺易儔秉而不息三夜有待臣名品卑末
事隔榮賜慈渥之隆實見因心小人賤微豈能勝報

除建康令謝啟

所恐長安少年易爲操彈渭城游徼矜其獨勇清路道

奴固知難憚輕綏飛駕且見爲榮

上東宮啟

亡從弟遵百行無點千里立志同氣三荆之友假寢十
起之慈皆體之於自然行之如俛拾自碣宮陪宴釣臺
從幸攀附鱗翼三十餘載茫昧與善一旦長辭劍匿光
芒璧碎符采躬搖神筆親動妙思雖每想南皮書憶阮
瑀行經北館歌悼子侯不足輩此深仁齊茲舊愛

爲晉安王謝東宮賜玉環刀啟

苗密珍鋌利極鉤鉞謹當擁以雄身藉而安體不令北海小雍孤擅穿膝之竒廬江佩刀獨表不欺之驗

爲晉安王謝賜鵝鴨啟

形類沈文經符陶記晉臣羞筮吳覲未占復有背如車蓋曾垂却月口疑犀機脚似魚懸出九芝之池去千金之沼

謝東宮賜橘啟

多置守民晉爲厚秩坐入縑素漢譬封君固以俛匹穰

橙俯聯楚柚寧似魏瓜借清泉而得冷豈如蜀食待飴
蜜而成甜重以倒影陽池垂葉金堞信可珍若榴於式
乾貴蒲萄於別館

謝東宮賚酒啟

異五齊之甘非九醞之法屬車未曾載油囊不得酤試
傳仙樹葛玄泥首才比蒲桃孟他銜璧固知託之養性
妙解怡神擬彼聖人差得連類

謝晉安王賜宜城酒啟

孝儀啟奉教垂賜宜城酒四器歲暮不聊在陰即慘惟
斯二理總萃一時少府鬪猴莫能致笑大夫落雉不足
解顏忽值瓶瀉椒芳壺開玉液漢遵莫遇殷杯未逢方
平醉而遁仙義和耽而廢職仰憑殊塗便申私飲未矚
罍恥已觀幘岸傾耳求音不聞霆擊澄神密眊豈覲山
高愈疾消憂於斯已驗遺榮勿賤即事不欺酌酌之中
猶知銘荷

謝晉安王賜銀裝絲帶啟

卷九十七
雕鏤新竒織製精潔越中玉女不得關思上方名匠莫
能議巧人情駭觀如見買臣之綬望貌移姿似逢子訓
之術

謝晉安王賜柑啟

便得削彼金衣咽茲玉液甘踰萍實冷亞水圭立消煩
餽頓除醕酌追嗤齊相進不剖之實遠笑魏君逢裂牙
之味

謝晉安王賚蝦醬啟

龍醬傳甘退誠可陋
蚺醢稱貴追覺失言
上聖聞雷未
之能覆嘉賓流歎羞
無辭寔

謝豫章王賜牛啟

觀其毛角相合骨像
應圖曳流水而生光
驚高限其如
接遂使上阜輒駕下
澤是驅馮軾脩途既
獲坐馳之致
馴拳廣庭方念載憂
之勗

謝豫章王賜馬啟

出自北冀來從東道
僣越兩驂驅同八駿
脩坂且厲無

復良樂之鳴長楸可走不假幽并之策

爲武陵王謝賜第啟

竊以南望朱鳥北距蒼龍右帶御溝左迴青路卑晏嬰
之湫隘同潘岳之間居臣幼自宮掖長游城府雖輪奐
之美多門而館第之私未暇今輕舟將反高門遽錫遂
葺宇築室百堵皆興雲屋連薨一朝弘敞

謝始興王賜車牛啟

下官安於躡屩習以成性乘堅驅駿未所厝心慈渥無

涯每垂獎飾無復難載之朋將申共弊之美濯龍望水
未足傳光長門聽雷不能均響

謝始興王賜花紈篔簹啟

麗兼桃象周洽昏明便覺夏室已寒冬裘可襲雖九日
煎沙香粉猶弃三旬沸海團扇可捐

謝始興王賜柰啟

酒泉之實稱於王賦瓜州之味記自張文亦有太冲嗟
其夏成子建暢其寒熟潘園曜白孫井浮朱並見重於

昔時而霑恩於茲日

謝鄱陽王賜鉢啟

珍窮貨貢製極範金用貴寶樽文包龍鼎雕鏤海籍圖
載山經閱衆靈於器中弄神姦於掌裏足令任后所欲
遠慙漢世少君有覲遙荒齊寢

爲王儀同謝宅啟

昔晏嬰湫隘齊景營其夾塏孫厯無家晉武爲之築館
或功高千載德重一時故蒙考室之榮以降葺宇之澤

並辭而處傳芳前載臣才愧昔人恩同往哲豈宜妄荷
重增疵矣但匈奴未滅遽當輪奐之美環堵爲室遂得
歌哭於斯

爲王儀同謝國姻啟

即日主書王靜民宣勅安吉主降嬪臣第三息實臣素
里庸族蓬衡賤品事隔伊緡之理望絕下嫁之姬而聖
慈猥洽皇姻曲逮荆布陋飾已膺凡獎負薪微屑復降
肅邕頻煩叨荷內外榮抃

書

北使還與永豐侯書

足踐寒地身犯朔風暮宿客亭晨炊謁舍飄飄辛苦迄
屆氈鄉邊徼覃化頗慕中國兵傳李緒之法樓擬衛律
所治而毳幙難淹酪漿易厭王程有限時及玉關射鹿
胡人乃共歸國刻龍漢節還持入塞馬銜首宿嘶疑故
墟人獲蒲萄歸種舊里稚子出迎善鄰相勞倦握蟹螯
亟覆蝦碗每取朱顏略多自醉用此終日亦以自娛

連珠

採物作豔體連珠二首

妾聞洛妃高髻不姿於芳澤
玄妻長髮無藉於金鈿
故雲名由於自美
蟬稱得於天然
是以梁妻獨其妖豔
衛姬專其可憐

妾聞芳性深情雖欲忘而不歇
薰芬動慮事逾久而更思
是以津亭掩馥抵結秦婦之恨
爵臺餘妬追生魏妾之悲

碑

雍州金像寺無量壽佛像碑

昔堯乃則天莫能名其聖丘纔譬日無得稱其道況復
欲宣五品將歎三法固使迦葉恥其無智龍樹羞其非
辯猶聞獻蓋長者頌以七言無學比丘陳其百句至有
九輩性生一身補處塵洗玉池神聞金葉樹聲繁會趙
簡於是未聞地實焜煌周穆之所不見昔者出城石轉
還林現疾夢樹既沉梵花獨反猶有香杖疊衣紅爪紺

髮可得崇以妙利顯用珍函彼彌陀感化殊攝日輪照
曜月面從容毫散珠輝脣開異色似含笑俱注目於
瞻仰如出軟言咸傾耳於諦聽像復以其夕出住寺門
始則映顯巖間猶對鷺山之禮末又徘徊閫外似救毗
城之疾空中生樹豈曰難思火內披蓮未爲多有銘曰
奄有淨國寶應多祉葉產梵童花開釋子玉蓮交映銀
荷遞起伊尹慙桑伯陽羞李

銘

平等刹下銘

有序

香薪已燎花疊盡然頻果絕其軟言綿毫收其廣照紺
鉢遺采託慕所依紅爪餘暉申悲是寄因使金表爭構
玉刹競脩豈止天界飾其四園龍宮陳其七寶樹似菴
林峯疑鷲色孕吐仙霧湧激靈泉燕室緣雲精廬切漢
制兼祕殿采美御房羲和假道於不愚翔鸞迴翼於飛
棟建章厭勝未及雕龕甘泉避暑豈窮輪奐檻綴玫瑰
階填粟玉絡以如意飾用沉檀火齊勝明燭銀颺采釋

梵奪其身光日車貶其輪照辭曰

惟茲寶塔妙跡可傳盤稱鄴境樓美涪川雙龍虛繞九
鳳徒懸豈如神刹耿介凌烟珠含魄月幡垂淨天寶鐸
夜響銀地朝鮮檐棲迥霧砌卷香蓮翻蠡下梵墜鶴歸
仙洎沙擾擾世界綿綿踐茲勝影祛彼蓋纏

樂府

從軍行

冠軍親挾射長平自合圍木落雕弓燥氣秋征鴈肥賢

王皆屈膝幕府復申威何謂從軍樂往返速如飛

詩

和昭明太子鍾山解講

詔一作樂臨東序時駕出西園雖窮理遊盛終爲塵俗

喧豈如弘七覺揚鸞啟四門夜氣清簫管曉陣爍郊原

山風亂采眊初景麗文轅林開前騎騁逕曲羽旄屯烟

壁浮青翠石瀨響飛奔迴輿下重閣降道訪真源談空

匹泉涌綴藻邁弦繁輕生逢遇誤並作輩龍鶴顧已同

偏爵何用挹衢樽

和簡文帝賽漢高廟

珪幣崇明祀牲樽禮貴神風驚如集廟光至似來陳徘徊靈駕入叫咷倡歌新將言非爲已致敬乃祈民多才與多事今古獨爲鄰

行過康王故第苑

入梁逢故苑度薛見餘宮尚識招賢閣猶懷愛士風靈光一超遠衡館亦蒙籠洞門餘舊色甘棠留故藪送禽

悲不去過客慕難窮池竹徒如在林堂暖已空遠橋隔
樹出迴澗隱岸通芳流小山桂塵起大王風具物咸如
此是地感余衷空想陵前劍徒悲壟上童

閨怨

本無金屋寵長作玉階悲一乖西北麗寧復城南期永
巷愁無歇玉臺作盡應門閉有時空勞織素巧徒爲團扇詞
匡牀終不共何由橫自私

帆渡吉陽洲

揚帆乘浪華搯鼓要風力近樹儵而遐遙山俄已逼欲
比驚龍掣將頓陽鳥翼客行悲道遠唯須前路極

詠簫

危聲合鼓吹絕弄混笙篴管饒知氣促釵動覺唇移蕭

一作
仙

史安爲貴能令秦女隨

詠織女

金鈿已照曜白日未蹉跎欲待黃昏後含嬌渡淺河

詠石蓮

蓮名堪百萬石姓重千金不解無情物那得似人心

和詠舞

迴履裾香散飄衫鈿響傳低釵依促管曼睇入繁絃

又和

轉袖隨歌發頓履赴絃餘度行過接手迴身乍斂裾

舞就行

依歌移弱步傍竹艷新粧徐來翻應節亂去反成行

漢魏六朝百三家集卷九十七

欽定四庫全書蒼要卷一萬九千六百九十集部

漢魏六朝百三家集卷九十八

明 張溥 輯

劉孝威集

啟

謝賚宮紙啟

臣與謝嘏俱慙具聖臣之衝梯實愧魯般之巧嘏之城壘特無禽子之守攻弱侮亡其勞甚薄策勲行賞爲渥

過隆雖復鄴殿鳳銜漢朝魚網平準桃花中宮穀樹固
以慙茲靡滑謝此鮮華

謝賚錦被啟

色豔蒲桃采踰聯璧鄂君慙繡楚侍羞珠雖復帝賜鶴
綾客贈駕綺高懸麗藻遠謝鮮明漢老悅其怪文魏馬
驚其香氣

謝勅賚畫屏風啟

昔紀亮所隔惟珍雲母武秋所顧止貴琉璃豈若寫帝

臺之基拂崑山之碧畫巧吳筆素踰魏賜馮商莫能賦
李尤誰敢銘

謝賚熊白啟

竊以館有射熊之名臺無走狗之號上林絕胡人之搏
禁地無張京之犯而突出羽川來攀御檻光踰厚壁殆
惑朱公之價色麗燭銀將堪穆王之寶

謝東宮賜聖僧餘饌啟

齊桓栢寢之器周穆軒宮之寶乳糜香飯素糝粳漿五

杏七桃靈瓜仙棗莫不氣馥上天薰流下界石崇芳果
金谷僅於萬株陳湯木滋杜陵幾于千樹猶自高謝珍
奇多慙品族

謝東宮賜淨饌啟

糜獻牛牧飯出龍宮千品甘露之食百花珍藥之果餅
兼髓乳漿苞蔗糕雕盤流其滋旨寶器委其包香足使
五世長者羞彼識味一角仙人恥其呪術微物多幸叨
奉曲恩性命可捐殊私難答

謝晉安王賜婚錢啟

孝威問吉已通請期有日而賢夫之譽多愧張耳非壻
之才偶同王粲矐言前事良以自羞曲降隆慈俯垂珍
錫便使禽贄獲舉纁幣有資佩服寵靈殞越非報

謝東宮賚炭啟

洛城雪深不見海神之跡滹沱冰合無待王霸之覘聚
而爲岳大壯黑山稱之以船將重牙獸鑪生烽焰室滿
紅光雉裘入而識奢鼠布焚而無汚

謝東宮賚鹿脯等啟

上林絕胡人之搏禁地無張京之犯而猶有班超游獵
李廣馳射遠歸於厨吏入貢於腊人形圖三事之車影
入九仙之鏡

謝東宮賚藕啟

色華玉樹味奪瓊漿根出楊池聞之僮約子爲靈散得
自莊篇楚后江萍秦公海棗凡厥水羞莫敢相輩

爲皇太子謝勅賚功德馬啟

伏惟忘我狗物屈已濟民該天地而大捨總日月而爲
施既脫輓於金輪又解驂於紺馬出余吾之水服駒駘
之廐名高夏后之龍價倍田方之贖謹當秣以栢葉飴
以丹棗加之玉鞍飾之金絡

謝南康王饒牛啟

雖復蜀守神牛秦公怒特穆王白角何氏瑩蹄無以逾
其勁力邁其致遠直宿九重獲免疏步路休三逕且息
徒行從祀甘泉方無假於丞相騎至清廟又永笑於博

陽

書

謝賚林檎書

勇聞齊國止錫二桃遠至仙方裁蒙數棗豈如恩豐漢
篋賜廣魏奩姹女數而僅通算郎計而方得生於玉井
之側出自金膏之地靈所貴下土希逢

贊

辟厭青牛畫贊

泰山怒特吳渚神牛氣噓風噴精迴電流詎牽和鞅不
入裴鞞狡力難京肆怒橫行朗陵瑩角介葛瞻聲遁仙
託稱妖寇馮名名震八區威陵五都蓄勇槽側息憤場
隅仇覽獻豆滕嬰進芻雄兒楷式悍士規模曹興拂采
徐邈成圖

正旦春雞贊

寶雞陳倉祠光表神雄飛帝漢雌飛霸秦排膺激怒礪
翅張瞋電鞭失焰雷車折輪助標魏教擅場齊珍名流

晉戟歌傳漢臣竊脂善盜搏穀難馴綠鸚智淺蒼鷹害
深兼姿五德歸于翰音

樂府

隴頭水

從軍戍隴頭隴水帶沙流時觀胡騎飲常爲漢國羞
妻成兩劍殺子祀雙鉤頓取樓蘭頸就解邳支裘勿令
如李廣功多遂不酬

一作功遂
不封侯

驄馬驅

十五官期門二十屯邊徼犀羈玉鏤鞍寶刀金錯鞘一
隨驄馬驅分受青蠅弔且令都護知願被將軍照誓使
氈衣鄉掃地無遺燧

公無渡河

請公無渡河河廣風威厲檣偃落金烏舟傾沒犀柅紺
蓋空嚴祠白馬徒生祭銜石傷寡心崩城掩孀袂劍飛
猶共水魂沈理俱逝君爲川后臣妾作江妃娣

塘上行苦辛篇

蒲生伊何陳曲中多苦辛黃金坐銷鑠白玉遂縑磷裂
衣工毀嫡掩袖切讒新嫌成跡易已愛去理難申秦雲
猶變色魯日尚迴輪妾歌已腸斷君心終未親

東西門行

此似應詔
餞贈之作

廣津寒欲歇聯檣密纜收天高匝近岫江闊少方舟
餞淚留神眷離欸切私儔佇變齊兒俗當傳楚獻囚徒然
頒並命祇惡思如抽

怨詩

退寵辭金屋見譴斥甘泉枕席秋風起房櫳明月懸燭
避窓中影香迴爐上烟丹庭斜草徑素壁點苔錢歌起
蒲生曲樂奏下山絃新聲昔廣宴餘杯今自傳王嬙向
絕漢宗女入祈連鴈書猶未返角馬無歸年昭臺有媵
御曾坂無棄捐後薪隨復積前魚誰更憐

採蓮曲

金槳木蘭船戲採江南蓮蓮香隔浦渡荷葉滿江鮮房
垂易入手柄曲自臨盤露花時濕釧風莖乍拂鈿

小臨海

碣石望山海留連降尊極秦帝枉鉤陳漢家增禮秩石
橋終不成桑田竟難測蜃氣遠生樓鮫人近潛織空勞
帝女填詎動波神色

思歸引

胡地憑良馬懷驕負漢恩甘泉烽火入回中宮室燔錦
車勞遠駕繡衣疲屢奔貳師已喪律都尉亦銷魂龍堆
求援急狐塞請先屯櫪下驅雙駿腰邊帶兩鞬乘障無

期限思歸安可論

一作
言

妾薄命篇

去年從越障今歲沒胡庭
嚴霜封碣石驚沙暗井陘
玉簪久落鬢羅衣長挂屏
浴蠶思漆水條桑憶鄭坵
寄書朝鮮吏留劍武安亭
勿言戎夏隔但令心契冥
不見豐城劍千祀復同形

鬪雞篇

丹雞翠翼張妬敵復專場
翅中含芥粉距外耀金芒
氣

踰上黨烈名貫下韞良祭橋愁魏后食跖忌齊王願賜
淮南藥一使雲間翔

結客少年場行

少年本六郡遨遊遍五都插腰銅匕首障日錦屠蘇
鷲羽裝銀鏑犀膠飾象弧近發連雙兔高彎落九烏邊城
多警急節使滿郊衢居延箭箠盡踈勒井泉枯正蒙都
護接何由憚險途千金募惡少一揮擒骨都勇餘聊蹴
踰戰罷暫投壺昔爲北方將今爲南面孤邦君行負弩

縣令且前驅

行行且遊獵篇

之采講射所上林娛獵場選徒驕楚客召狩誇胡王
車已戒道風鳥復起行飲飛具矰繳材官命蹶張高
置掩月兔勁矢射天狼蹶地不遑逸排虛豈及翔日暮
勾陳轉風清鏡吹颺歸來宴平樂寧肯滯禽荒

雀乳空井中

晉傅玄詩曰鵲巢丘

城側雀乳空井中

遠去條支國心知漢德休

一作優

聊栖丞相府過令黃霸

羞挾子須閒地空井共尋求
輓轡絲綆絕桔槔冬蘇周
將憐羽翼張誰辭各背遊

半渡溪

本廁偏伍伴一戰殄凶渠
制賜文犀節驛報紫泥書
入營陳御蓋還家乘紫車
皇恩知己重丹心恨不紆
渡瀘且不畏凌溪嗟有餘

獨不見

夫婿結纓簪偏蒙漢寵深中人引卧内副車遊上林綬
染瑯琊草蟬鑄武威金分家移甲第留妾住河陰獨寢
鴛鴦被自理鳳凰琴誰憐雙玉筯流面復流衿

行幸甘泉宮歌

漢家迎夏畢避暑甘泉宮棧車鳴里鼓駟馬駕相風校
尉烏桓騎待制樓煩弓後旌猶五柞前笳度九峻才人
豹尾内御酒屬車中輦迴百子閣扇動七輪風鳴鐘休
衛士披圖召後官材官促按獵涼秋

一作戲射熊
秋來

箜篌謠

結交在相得骨肉何必親
甘言無忠實世薄多蘇秦
從風暫靡草富貴上昇天
不見山巔樹摧圯下爲薪
豈甘井中泥上出作埃塵

一云時至
出作塵

驄馬驅

翩翩驄馬驅橫行復斜趨
先救遼城危後拂燕山霧
風傷易水湄日入隴西樹
未得報君恩聯翩終不住

和王竟陵愛妾換馬

驄馬出樓蘭一步九盤桓小史贖金絡良工送玉鞍龍
驂來甚易烏孫去實難麟膠妾猶有請爲急弦彈

擬古應教一首

七言。樂府作考威詩題云東
飛伯勞歌英華作簡文帝非也

簡文別

有二首

雙棲翡翠兩鴛鴦巫雲洛月乍相望誰家妖冶折花枝
蛾眉曼睇使情移青鋪綠璫琉璃扉瓊筵玉筍金縷衣
美人年幾可十餘含羞轉笑斂風裾珠丸出彈不可追
空留可憐持與誰

雞鳴篇

以下雜言。藝文作簡文帝

埶雞識將曙長鳴高樹顛
啄葉疑彰羽排花彊欲前
意氣多驚舉飄揚獨無侶
陳思助鬪協狸膏
邠昭妬敵安金距
丹山可愛有鳳凰
金門飛舞有鴛鴦
何如五德美豈勝千里翔

烏生八九子

城上烏一年生九雛
枝輕巢本狹風多草
早枯毳毛不自暖
張翼強相呼
金柝嚴兮翠樓
肅蜃壁光兮椒泥馥

虞機衡網不得施猜鷹鷲隼無繇逐永願共棲曾氏冠
同瑞周王屋莫啼城上寒猶賢野中宿羽成翮備各西
東丁年賦命有窮通不見高飛帝輦側遠託日輪中尚
逢王吉箭猶嬰后羿弓豈如變彩救燕質入夢祚昭一作
周公流聲表師退集幕示營空靈臺已鑄像流蘇時候

風

蜀道難

玉壘高無極銅梁不可攀雙流逆巖道九坂澁陽關鄧

侯策馬度王生斂轡還斂轡懼身尤叱馭奉王猷若恠
千金重誰爲萬里侯戲馬吞珠界揚舲濯錦流沈犀厭
怪水握鏡表靈丘禹山金碧有光輝遷亭車馬尚輕肥
彌想王褒擁節反更憶相如乘傳歸君平子雲闕不嗣
江漢英靈信已衰

詩

重光詩

井序。以下四言。

重光儲后宣制義也

赫赫重光明明二聖帝作儲述禮和樂正中衢置樽高
堂懸鏡其酌不窮其明逾盛德音孔昭民胥攸詠明明
二聖赫赫重光風神灑落容止汪洋瞻彼談扇載抑載
揚何斯天辯如圭如璋顏閔函席游夏升堂以卿以士
惟公惟王思媚儲君顧哉樂康芄芄黍苗陰雨膏之詵
詵纓冕儲王導之道之以禮齊之以仁禮則探聖言則
窮神訓于四國覃于萬民

侍宴樂遊林光殿曲水

蒸哉軒頊赫矣堯心女媧補石重華紫一作棄金湯羅禹

扇義瑟農琴皇乎備矣受命君臨試舟五反和樂九成
鈎楯祕戲協律新聲丹杯水激縫彩葩榮天吳還往海
若逢迎

奉和簡文帝太子應令

以下
五言

太子天下本元良萬國貞周朝推上嗣漢代紀重明前
星涵瑞彩洊雷揚遠聲三善傳樂正百行紀司成九流
遍已辨七經咸所精博聞強子政高才陵長卿禮尊逾

屈已德盛益卑情仙氣貽一作胎鍾相儒道推桓榮延賢

博望苑視膳長安城園綺隨金輅浮丘侍玉笙智囊前
斂笏端士後垂纓九仙良所重四海更誰傾班輸同策
乘甲館齊蓬瀛

三日侍皇太子曲水宴

二龍巡夏代八駿馭周朝豫遊光帝則樂飲盛民謠皇
儲遵洛禊濫觴追灞橋掌袂開神籙司馬動鑿鑿周旗
交采眊晉鼓雜清簫旌宮臨廣隰藻衛爍巖椒蘭樽沿

曲岸靈若沂迴潮

奉和六月壬午應令

玄圃棲金碧靈澗挹琨瑤築山圖碣岫穿池控海潮雷
奔石鯨動水闊牽牛遙乘黿猶却渡鞭石詎成橋岸崩
下生窟壁峭上千霄噪蛙常獨沸游魚或自跳荒徑橫
臨浦空舟斜插橈愁鴟集古樹白鷺隱青苗神心重丘
壑散步懷漁樵石累元卿徑枝挂許繇瓢伊臣本寂寞
繇來畏市朝爲貪止山水所競惟逍遙寄言周伯況勞

君擅縠綃

登覆舟山望湖北

紫川通太液丹岑連少華堂皇更隱映松灌雜交加荇
蒲浮新葉漁舟繞落花浴童爭淺岸漂女擇平沙極望
傷春目迴車歸狹斜

帆渡吉陽洲同孝儀賦

江風

一作潮

凌曉急鉦鼓候晨催幸息榜人唱聊望高帆

開聯村倏忽盡循汀俄頃回疑是傍洲退似覺前山來

將與圖南競誰云勞沂洄

出新林

卬山眠洛邑函谷望秦京遙分承露掌遠見長安城故
鄉已可識遊子必勞情霧罷前林見一作曠風息涌川平
坐觀暮潮落漸見夕烟生無由一羽化徒想御風輕

却縣遇見人織率爾寄婦

妖姬含怨情織素起秋聲度梭環玉動踏躡珮珠鳴經
稀疑杼澁緯斷恨絲輕葡萄始欲罷鴛鴦猶未成雲棟

共徘徊紗窓相向開窓踈眉語度紗輕眼笑來籠籠隔
淺紗的的見粧華鏤玉同心藕一作帶雜寶連枝花紅衫

向後結金簪臨鬢斜機頂挂流蘇機傍垂結珠青絲引
伏兔黃金繞轆轤豔彩裙邊出芳脂口上渝百城交問
遺五馬共踟躕直爲閨中人守故不要新夢啼漬花枕
覺淚濕羅巾獨眠真自難重衾猶覺寒逾憶凝脂緩彌
想橫陳歡行驅金絡騎歸就城南端城南稍有期想子
亦勞思羅衣久應罷花釵堪更治新粧莫點黛余還自

畫眉

侍宴賦得龍沙宵明月

鵲飛空繞樹月輪殊未圓
嫦娥望不出桂枝稍隱殘
落照移樓影浮光動整瀾
櫪馬悲笳吹城烏啼塞寒
傳聞機杼妾愁余衣服單
當秋絡已脆銜啼織復難
斂眉雖不樂舞劍強爲歡
請謝函關吏行當封一丸

奉和晚日

虬簷挂珠箔虹梁卷霜綃
迷迭涵香長芙蓉逐浪搖
飛

輪搏羽扇翻車引落潮甘泉推激水迎風慙遠颺寄言
王待詔因聲張子僑吾君安已樂無勞誦洞簫

和皇太子春林晚雨

雲樹交爲密雨日共成虹雷舒長男氣枝搖少女風葉
珠隨滴水簷繩下溜空蝶濡飛不颺花沾色更紅明離
信養德能事畢春宮誰堪偶鳳吹唯有浮丘公

行還值雨又爲清道所駐

齊楚般石貴韓吳異姓王俱乘早朝罷相隨出建章喧

呼驚里閑叫吡駭康莊阜駟同隼擊青橐似鷹揚掖門
南北遠復道東西長旛旗爭絡繹官騎鬱相望微風生
祭傳輕雨潤帷裳油衣分競道小蓋列成行八舍便繁
密五營輿服光迴車避司隸俄軒揖內郎況余白屋士
自依卑路傍日月雖臨照仄陋難明敷早榮羞日及晚
知慙豫章徒抱凌雲志終愧摩天翔安能久淪辱圖南
會有方

望雨

清陰蕩暄濁飛雨入階廊
瞻空亂無緒望雷耿成行
交枝含曉潤雜葉帶新光
浮芥離還聚沿漚滅復張
浴禽飄落毳風苻散餘香
瑤綃挂繡幕象簟列華牀
侍童拂羽扇厨人奉盪漿
寄言楚臺客雄風詎獨涼

苦暑

暮日苦炎溽遷坐接階廊
月麗姮娥影星含織女光
棲禽動夜竹流螢出閣牆
香盤糝鮮粉雕壺承玉漿
白羽徒垂握綠水自周堂
弱紈猶覺重織絺尚少涼
弄風思

漢朔戲雨憶吳王
玄冰術難驗赤道漏猶長
誰能更吹律還令黍谷涼

奉和逐涼

鐘鳴夜未央避暑起徬徨
長河似曳素明星若散璫
倚巖欣石冷臨池愛水涼
月織張敞畫荷妖韓壽香
對此遊清夜何勞娛洞房

望棲鳥

夕鳥飛參差單雄雜寡雌
聯翩歸葉裏出沒噪林垂
爭

棲時易樹驚飛忽度枝雖無繫書重亦有含纓疲以茲
憔悴力重逢輕薄兒珠丸蘇合彈金綴青絲縻豈意翩
翾羽遂免更羸危入懷欣得地依林竊願知

和簡文帝卧疾

玉躬耗寒暑羣望崇珪璧仁祀盛黃縑禮壇優紺席億
均楚疾愈俄同宋年益豈勞誦賦臣寧用觀濤客

賦得曲澗

澗流急易轉溪竹暗難開近樓俄已失前洲忽復迴石

岸生寒蘚沈根漬水苔
菱舟失道去歸鳥迷徑來

奉和湘東王應令二首

春宵

花開人不歸節暖衣須變
迴釵挂反環拭淚繩春線
今夜月輪圓胡兵必應戰

冬曉

妾家邊洛城慣識曉鐘聲
鐘聲猶未盡漢使報應行
天寒硯冰凍心悲書不成

詠織女

玉臺初學
作孝儀

金鈿已照耀白日未蹉跎
欲待黃昏至含嬌度淺河

七夕穿針

和簡文

縷亂恐風來衫輕羞指現
故穿雙眼針持縫合歡扇

九月酌菊酒

露花疑始摘羅衣似適薰
餘杯度不取欲持嬌使君

賦得鳴螿應令

雜扇雖俱斂交行忿自分
轉袖時繞腕揚履自開裾

和定襄侯初筭

合髮仍昔髮略鬢即前絲從今一梳罷無復更縈時

古體雜意

朝日大風霜寄事足交傷葉落枝柯淨常自起碁張

詠佳麗

可憐將可念可念直千金唯言有一恨恨不遂人心

望隔墻花

隔墻花半隱猶見動花枝當由美人摘詎止春風吹

枯葉竹

枯楊猶更綠，卧柳尚還生。
勿嫌鳳不至，終當待聖明。

和簾裏燭

開闌簾影出，參差風焰斜。
浮光燭綺帶，凝滴汗垂花。

詠剪綵花

葉舒非漸大，花發是初開。
無論人訝似蜂見，也爭來。

禊飲嘉樂殿詠曲水中燭影

七言

火浣花心猶未長，金枝密焰已流芳。
芙蓉池畔涵停影。


桃花水脈引行光

賦得香出衣

雜言

香出衣步近氣逾飛博山登高用鄴錦含情動屬比洛
妃香纓麝帶縫金縷瓊花玉勝綴珠徽蘇合故年微恨
歇都梁路遠恐非新猶賢漢君芳千里尚笑荀令止三
句

漢魏六朝百三家集卷九十八



總校官庶吉士 臣 侍 朝

校對官中書 臣 張 頊

膳錄監生 臣 李青標